



Kamis, 23 Maret 2023
Ogen: Matius 5:10-12



“Upah Ngalaken Kiniseran”



Pengarapen dingén sura-sura manusa nggeluh i doni enda e me: kegeluhen sikap, kebutuhen sekolah anak-anak tercukupi, usaha/pendahin lancar, anak-anak patuh er-orangtua ras erkemalangen man Dibata, sehat daging kula bage pe perukuren. Tapi banci saja kerina arapen dingén sura-sura e la seratus persen banci ialoken. Janah tupung la kerina banci ialoken turah me kiniseran-kiniseran erkiteken aru ate. Pengarapen manusa kerna kemalemen ate mekatep rikutken sura-surana saja; janah ulih arah kai si iarapkenna e erbahan ia mejuah-juah. Misalna: pengarapen manusa adi ia njaga pola makan ras istirahat lanai banci sakit entah pe adi erbintuas ia suari ras berngi banci ngaloken ulih si erbahanca tercukupi kerina keperlun geluhna.

Matius 5:10-12 nuratken maka kalak sindalanken perdamen, si ngenanami kiniseran erkite-kiteken nehken peraten Dibata bage pe erkite-kiteken jadi ajar-ajar Kristus janah igombang-gombang ras ipesega-sega kalak ndatken kemalemen ate si jadi upahna. Matius naksiken maka kemalemen ate i tengah-tengah kegeluhen enda labo erkiteken seh kerina bagi isuraken tapi kemalemen ate situhutu e me erkiteken sidalanken janah silakoken rikutken singena ate Dibata. Pemahamenta kerna ulih/upah berbeda kal ras kai si isuratken i bas Pustaka Si Badia. Adina kita memahami maka kalak si erdahin tentu ngaloken upah si patut rikutken tenaga si i pakai pemakai jasa; tapi i bas Pustaka Si Badia upah/ulih berbeda kal ras pengangkan manusa.

Upah si ialoken adi kita ngenanami kiniseran erkiteken nehken peraten Dibata, erkiteken kita ajar-ajar Kristus aminna pe megati igombang-gombang kalak e me kemalemen ate janah upah si mbelin enggo isikapken Dibata i surga. Berbeda kal ras kai si iarapken manusa. Alu bage dage tetaplah kita ngarapken upah i bas ngalaken kiniseran si nggo isikapken Dibata man banta.

☞ Kemalemen ate kalak si tetap setia er-Dibata i bas kiniseran